

# 泊宅編/卷一



以2025年1月21日从维基文库导出

陽孝本字行先，居虔州城西，學博行高。東坡謫惠州，過而愛之，號曰「玉巖居士」，仍為作真贊。居士不娶，坡每來，直造其室，嘗戲以元德秀呼之。居士曰：「某乃陽城之裔。」故坡詩曰：「眾謂元德秀，自稱陽道州。」皆謂無妻也。居士後以遺逸得官。

吳師仁字坦求，錢塘人。篤學勵誌，不事科舉。守臣陳襄、鄧溫伯、蒲宗孟皆以遺逸薦於朝。元祐初，被召命以學官。初，坦求喪親，廬其墓，日托棲真寺隨僧造飯一鉢以充饑，不復置庖爨、蓄奴僮，閉戶翛然讀書，倦則默坐而已。嘗一夕，已滅燭，室中忽自明，有僧長揖而入，與坐談玄久之，謂坦求曰：「教授行且仕宦，壽不過六十。」僧去而復暗如初。坦求為太學博士，十年無他除改，其後以選除潁川、吳王宮教授，卒年五十七。

王升字君儀，居嚴州烏龍山。布衣蔬食，無書不讀，道、釋二典，亦皆遍閱。為湖、婺二州學官，罷歸山中，杜門二年不赴調。一日，自以箕子《易》筮之，始治裝西去，時年將六十矣。旅京師數月，良倦，將謀還鄉，左丞薛昂以其所撰《冕服書》獻之，稍歷要官。君儀之學，尤深於《禮》、《易》，久為明堂司常。宣和乙巳，以待制領官祠，復居烏龍故廬。每正旦，筮卦以卜一歲事，豫言災祥，其驗甚多。金人據臨安，諸郡驚擾，嚴人皆引避山谷間，公獨燕處如平時，且增葺舍

宇，以示無虞。壬子正月，微感疾，謂貳車黃策曰：「陸農師待我為屬官，不久當往，但《太元書》未畢，且不及見上元甲子太平之會，此為恨爾。」數日卒，年七十九。

東坡既就逮下御史獄，一日，曹太皇詔上曰：「官家何事數日不懌？」對曰：「更張數事未就緒，有蘇軾者，輒加謗訕，至形於文字。」太皇曰：「得非軾、轍乎？」上驚曰：「娘娘何自聞之？」曰：「吾嘗記仁宗皇帝策試制舉人罷歸，喜而言曰：『今日得二文士，然吾老矣，度不能用，將留以遺後人。』二文士蓋軾、轍也。」上因是感動，有貸軾意。

朱行中自右史帶假龍出典數郡，年才逾壯。守東陽日，嘗作春詞雲：「小雨廉纖風細細，萬家楊柳青煙裏。戀樹濕花飛不起。愁無比，和春付與西流水。九十光陰能有幾，金龜解盡留無計。寄語東城沽酒市，拼一醉，而今樂事他年淚。」自以為得意。後歷中書舍人，帥番禺，得罪，安置興國軍以死。流落之兆，已見於此詞。

王欽臣自西京一縣令召入，議法與介甫不合，令學士院試賦一篇，但賜出身，卻歸本任。以二詩獻公，其一雲：「蜀國相如最有詞，武皇深恨不同時。凌雲賦罷還無用，寂寞文園意可知。」其二雲：「古木陰森白玉堂，老年來此試文章。宮檐日永揮毫罷，閉拂塵埃看畫墻。」

東坡帥杭，一日，與徐璣坐雙檜堂，吟曰「二疏辭漢去」，璣應聲曰：「大老入周來。」璣字全夫，少年登

科，疏縱不事事，晚益流落，終於武義縣主簿。嘗寓婺州清澗寺，醉中題壁雲：「驚雷殷殷南山曲，一夜山前春雨足。美人睡起怯輕寒，衣褪香綃紅減玉。朝雲靄靄弄晴態，野柳狂花無管束。東風也自足春情，吹皺兩溪煙水綠。」

元祐中，東坡帥杭。予自江西來應舉，引試有日矣，忽同保進士訟予戶貫不明，賴公照憐，得就試；因預薦送，遂獲遊公門。公嘗雲：「王介甫初行新法，異論者譏譏不已。嘗有詩雲：『山鳥不應知地禁，亦逢春暖即啾啾。』又更古詩『鳥鳴山更幽』作『一鳥不鳴山更幽』。」

歐公作《醉翁亭記》後四十九年，東坡大書重刻於滁州，改「泉冽而酒香」作「泉香而酒冽」，「水落而石出」作「水清而石出」。

馮當世未第時，客余杭縣，為官逋拘窘，計無所出，題小詩於所寓寺壁。一胥魁範生見之，為白令，丐寬假。令疑胥受賂遊說，胥雲：「馮秀才甚貧，某但見其所留詩，知他日必顯。」出其詩，令笑釋之：「韓信棲遲項羽窮，手提長劍喝秋風。籲嗟天下蒼生眼，不識男兒未濟中。」

介甫嘗戲作《走卒集句》雲：「年去年來來去忙，倚他門戶傍他牆。一封朝奏緣何事，斷盡蘇州刺史腸。」

先子晚官鄧州，一日，秋風起，忽思吳中山水，嘗信筆作長短句《黃鶴引》，遂致仕。其敘曰：予生浙東，世

業農。總角失所天，稍從裏閤儒者遊。年十八，嫠以充貢。凡七至禮部，始得一青衫。間關二十年，仕不過縣令，擢才南陽教授。紹聖改元，實六十有五歲矣。秋風忽起，亟告老於有司，適所願也。謂同誌曰：「仕無補於上下，而退號朝士。婚嫁既畢，公私無虞。將買扁舟，放浪江湖中，浮家泛宅，誓以此生，非太平之幸民而何？」因閱阮田曹所制《黃鶴引》，愛其詞調清高，寄為一闕，命稚子歌之，以侑尊焉。「生逢垂拱。不識幹戈免田隴。士林書圃終年，庸非天寵。才初鬪茸。老去支離何用？浩然歸弄。似黃鶴、秋風相送。塵事塞翁心，浮世莊周夢。漾舟遙指煙波，群山森動。神閑意聳。回首名鞿利鞅。此情誰共？問幾斛、淋浪春甕。」

韓退之多悲，詩三百六十，言哭泣者三十首。白樂天多樂，詩二千八百，言飲酒者九百首。

徽宗興畫學，嘗自試諸生，以「萬年枝上太平雀」為題，無中程者。或密扣中貴，答曰：「萬年枝，冬青木也；太平雀，頻伽鳥也。」是時，殿試策題，亦隱其事以探學者。如大法斷案，一案凡若干刑名，但取其合者，不問詞理優劣。或曰：「王言而匿，其指奈何？」曰：「此正古之射策，在兵法所謂多方以誤之也。」

自古繼世宰相，前漢所稱韋、平而已，漢袁、楊二族最盛，亦不過三四人。唯李唐一門十相者良多。至聞喜裴氏、趙郡李氏，一家皆十七人秉鈞軸，何其盛也！本朝父子繼相，韓、呂之後未聞。

自古相國最久者，唯召公三十六年；一朝宰相最多者，唯武後六十八人。

韓忠獻公之子粹彥帥定武，或勸取幽燕者，粹彥折之曰：「國家奄有四海，寧少此一彈之土耶？」唐庚作傳贊曰：「仁人之言，其利博哉！始之者寇萊公，成之者公也。」

王黼自入仕登庸，無他異，唯合眼時覺有物隱隱如玉箸，頭長不盈寸，開眼則無之，他人不知也。每有慶事，則微癢而動搖，率以為常。靖康初，金人犯闕，黼正憂遽，忽癢甚，喜不自勝；微以手按之，其物忽落掌中，狀如箸。不久及禍。

介甫嘗晝寢，謂葉濤曰：「適夢三十年前所喜一婦人，作長短句贈之，但記其後段：『隔岸桃花紅未半，枝頭已有蜂兒亂。惆悵武陵人不管。清夢斷，亭亭佇立春宵短。』」

姚祐自殿監遷八座，不數進見。母夫人久病痢，諸藥不效，憂悶不知所出，令李昂筮軌革，有「真人指靈草」之語。一日，登對，上訝其悴，具以實奏。詔賜一散子，數服而愈，仍喻只炒椿子熟末之飲下。

王直方雲：王介甫在翰苑，見榴花止開一朵，有「濃綠萬枝紅一點，動人春色不須多」之句。陳正敏謂此乃唐人詩，介甫嘗題扇上，非其所作。

# About this digital edition

This e-book comes from the online library [Wikisource](#)<sup>[1]</sup>. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)<sup>[2]</sup> license or, at your choice, those of the [GNU FDL](#)<sup>[3]</sup>.

Wikisource is constantly looking for new members. During the realization of this book, it's possible that we made some errors. You can report them at [this page](#)<sup>[4]</sup>.

The following users contributed to this book:

- Wmrwiki
- Dalek sg

1. [↑ https://wikisource.org](https://wikisource.org)
2. [↑ https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
3. [↑ https://www.gnu.org/copyleft/fdl.html](https://www.gnu.org/copyleft/fdl.html)
4. [↑ https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)